

0.0.1 khayasuttam

1. yo bhikkhave, maggo yā paṭipadā taṇhakkhayāya saṁvattati¹, taṃ maggaṃ taṃ paṭipadaṃ bhāvētha. katamo ca bhikkhave, maggo katamā ca paṭipadā taṇhakkhayāya saṁvattati: yadidaṃ sattabojjhaṅgā. katame satta: satisambojjhaṅgo dhammavicayasambojjhaṅgo viriyasambojjhaṅgo pītisambojjhaṅgo passaddhisambojjhaṅgo samādhisambojjhaṅgo upekkhāsambojjhaṅgoti. evaṃ vutte āyasmā udāyi bhagavantaṃ etadavoca: kathaṃ bhāvitā nu kho bhante, satta bojjhaṅgā kathaṃ bahulīkatā taṇhakkhayāya saṁvattanti.

2. idhūdāyi, bhikkhu satisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ² mahaggataṃ appamāṇaṃ abyāpajjhaṃ. tassa satisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

3. dhammavicayasambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ.

¹saṁvattanti - sī, 1, 2.

²vepullaṃ - sī 1, 2.

tassa dhammavicayasambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

4. viriyasambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa viriyasambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

5. pītisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa pītisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

6. passaddhisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vi-

pulaṃ mahaggataṃ appamāṇaṃ abyāpajjhaṃ. tassa passaddhisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

7. samādhisambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa samādhisambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.

8. upekkhāsambojjhaṅgaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ vipulaṃ mahaggataṃ appamāṇaṃ abyāpajjhaṃ. tassa upekkhāsambojjhaṅgaṃ bhāvayato vivekanissitaṃ virāganissitaṃ nirodhanissitaṃ vossaggapariṇāmiṃ. vipulaṃ mahaggataṃ appamāṇaṃ abyāpajjhaṃ. taṇhā pahīyati. taṇhāya pahānā kammaṃ pahīyati. kammaṃ pahānā dukkhaṃ pahīyati. iti kho udāyi, taṇhakkhayā kammakkhayo. kammakkhayā dukkhakkhayoti.